

**ZAKON O UTVRĐIVANJU I REALIZACIJI POTRAŽIVANJA GRAĐANA U
POSTUPKU PRIVATIZACIJE**

I - OSNOVNE ODREDBE

Član 1.

Ovim zakonom uređuje se: utvrđivanje i realizacija potraživanja građana prema Federaciji Bosne i Hercegovine (u daljem tekstu: Federacija), način evidentiranja i postupak realizacije ovih potraživanja u postupku privatizacije.

Član 2.

Potraživanjima građana, koja se izmiruju u skladu sa ovim zakonom, smatraju se potraživanja po osnovu stare devizne štednje, po osnovu kompenzacije za denacionalizovanu imovinu koja se ne može vratiti u vlasništvo i posjed, potraživanja po osnovu neisplaćenih plaća pripadnika Armije RBiH, Hrvatskog vijeća obrane i Policije i opća potraživanja građana utvrđena Zakonom o privatizaciji preduzeća.

II - POTRAŽIVANJA GRAĐANA PO OSNOVU STARE DEVIZNE ŠTEDNJE

Član 3.

Lice koje ima deviznu štednju u bankama ili poslovnim jedinicama sa sjedištem na teritoriji Federacije iznad 100 DEM, a bilo je državljanin Bosne i Hercegovine na dan 31. marta 1991. godine i ima prebivalište na teritoriju Federacije na dan stupanja na snagu ovog zakona, stiče potraživanja prema Federaciji sa stanjem štednje na dan 31. marta 1992. godine.

Realizacija potraživanja građana koji su na dan 31. marta 1991. godine imali državljanstvo Bosne i Hercegovine, a koji na dan stupanja na snagu ovog zakona nemaju prebivalište na teritoriji Federacije, kao i drugih lica, koja imaju devizna potraživanja u bankama na teritoriji Federacije, u smislu ovog zakona, uredit će se posebnim propisom.

Licima iz stava 1. ovog člana s deviznom štednjom do 100 DEM banke će na njihov zahtjev isplatiti iznos štednje.

Potraživanja iz stava 3. ovog člana dospijevaju po isteku roka od tri mjeseca od dana primjene ovog zakona.

III - EVIDENTIRANJE POTRAŽIVANJA GRAĐANA

Član 4.

Potraživanja građana iz člana 2. ovog zakona iskazuju se u DEM.

Potraživanja građana iz člana 3. ovog zakona preračunavaju se u DEM po odnosima valuta, po kursnoj listi Narodne banke Bosne i Hercegovine, na dan 31. marta 1992. godine.

Član 5.

Potraživanja građana po svim osnovama iz člana 2. ovog zakona iskazuju se na jedinstvenom računu građanina (u daljem tekstu: Jedinstveni račun) u organizacionoj jedinici Federalnog zavoda za platni promet (u daljem tekstu: Zavod) prema mjestu prebivališta građanina.

Član 6.

Potraživanja iz člana 21. Zakona o privatizaciji preduzeća unose se na Jedinstveni račun po nalogu Agencije za privatizaciju u Federaciji Bosne i Hercegovine, što se uređuje posebnim aktom.

Član 7.

Potraživanja iz člana 3. ovog zakona banka prenosi na Jedinstveni račun štediše. Način prenosa potraživanja građana iz stava 1. ovog člana čiji se računi vode u bankama kod kojih su organizacione jedinice na teritoriju Federacije prestale s radom, uredit će se posebnim propisom Federalnog ministarstva finansija.

Član 8.

Potraživanja po osnovu Zakona o restituciji unose se na Jedinstveni račun na osnovu pravomoćnog akta o utvrđivanju prava na restituciju.

Član 9.

Potraživanja po osnovu ostvarenih, a neisplaćenih plaća pripadnika Armije RBiH, Hrvatskog vijeća obrane i Policije, unose se na osnovu javne isprave izdate od nadležnog organa.

Član 10.

Organi nadležni za utvrđivanje potraživanja iz čl. 6, 7. i 9. ovog zakona dužni su u roku od 60 dana od dana početka primjene ovoga zakona, dostaviti Zavodu naloge za upis potraživanja na Jedinstveni račun građanina.

Član 11.

Otvaranje Jedinstvenih računa vrši se po službenoj dužnosti na osnovu matičnog broja građana-nosilaca potraživanja iz ovog zakona. Jedinstveni račun predstavlja certifikat građanina.

Član 12.

O stanju na Jedinstvenom računu Zavod izdaje građaninu izvod sa računa. U izvodu sa Jedinstvenog računa posebno se iskazuju potraživanja iz čl. 7, 8. i 9. ovog zakona. Zavod je obavezan da poslije svake promjene na Jedinstvenom računu izda novi izvod.

Član 13.

Zavod je obavezan da dnevno izvještava Agenciju za privatizaciju u Federaciji Bosne i Hercegovine i kantonalne-županijske agencije za privatizaciju o zbirnom stanju Jedinstvenih računa - ukupno za Federaciju i po kantonima-županijama.

Član 14.

Građanin ima pravo, u roku od 30 dana od dobijanja izvoda, zahtijevati od organa nadležnog za utvrđivanje pojedinih potraživanja, ispravku iznosa potraživanja.

Ukoliko organ iz stava 1. ovog člana utvrdi da je zahtjev građanina opravdan, dužan je bez odlaganja izdati nalog Zavodu za ispravku iznosa po osnovu stava 1. ovog člana.

IV - REALIZACIJA POTRAŽIVANJA GRAĐANA

Član 15.

Potraživanje sa Jedinostvenog računa građani mogu u skladu sa zakonom koristiti za kupovinu:

- stanova na kojima postoji stanarsko pravo;
- dionica preduzeća;
- imovine preduzeća;
- poslovnih prostora u vlasništvu općina, i
- druge imovine koja se bude prodavala u procesu privatizacije.

Član 16.

Potraživanja na Jedinostvenom računu su prenosiva.
Prenos potraživanja se vrši nalogom za prenos kod Zavoda.

Član 17.

Plaćanje po osnovu kupovine smatra se izvršenim momentom prenosa potraživanja sa Jedinostvenog računa na račun prodavca.

Član 18.

Potraživanja sa Jedinostvenog računa mogu se koristiti u postupku privatizacije u roku od dvije godine od njihovog upisa na Jedinostveni račun.
Istekom roka iz stava 1. ovog člana, potraživanja na Jedinostvenom računu se gase.

V - PRELAZNE I ZAVRŠNE ODREDBE

Član 19.

Oblik i sadržaj naloga za prenos i izvoda sa Jedinostvenog računa i visinu naknade po osnovu prometa potraživanja na jedinstvenom računu utvrđuje Federalno ministarstvo finansija u roku od 60 dana od stupanja na snagu ovog zakona.

Član 20.

Direktor Agencije za privatizaciju u Federaciji Bosne i Hercegovine će u roku od 30 dana od stupanja na snagu ovog zakona donijeti Uputstvo o evidenciji i realizaciji potraživanja sa Jedinostvenog računa.

Član 21.

Ovaj zakon stupa na snagu danom objavljivanja u "Službeneim novinama Federacije BiH", a primjenjivat će se po isteku 90 dana od dana stupanja na snagu ovog zakona.